

# Repower cun dus acziunaris novs en l'avegnir

Ils acziunaris da Repower han sancziunà a la radunanza extraordinaria a Cuira tut las propostas dal cussegl administrativ

DA MARTIN CABALZAR

■ **En l'avegnir sa cumpona il concern d'energia dal Grischun Repower da quatter acziunaris principals, numnadadain dal chantun Grischun e da l'Axpo Holding SA (fin quà) e da las Ovras electricas da Turitg (EKZ) e da UBS Clean Energy Infrastructure Switzerland SA (UBS-Cleis.** Cun ina maiortad da passa 99% han ils acziunaris da Repower sancziunà ier a Cuira in auzament dal chapital d'acziunaris dad actualmain 3 408 115 francs per maximal 4 771 361 francs sin maximal 8 179 476 francs.

Ils dus acziunaris novs vulan investir ensemen 150 milliuns en Repower, resp. comprar acziunaris per questa summa. Ils dus acziunaris existents, il chantun Grischun e la Axpo, renunzian da comprar novas acziunaris. Cun questa transacziun remplazzan las Ovras electricas da Turitg il chantun Grischun sco acziunari principal tar Repower. Il pretsch d'emissiu da las novas acziunaris munta ad in franc, il pretsch da compra per acziunaris novas a 43 francs per aczia nominala. Mintgamai tschintg acziunaris valaivlas avant l'augment dal chapital d'acziunaris lubeschan da retrair ina equivalenza da set acziunaris tar l'augment dal chapital d'acziunaris.

Las novas investiziuns en acziunaris èn da prestar en daner blut. Las novas acziunaris han gia 2016 il dretg d'ina dividenda.

## Rinforzar la basa da chapital

Sco quai ch'il schef operativ da Repower Kurt Bobst ha declerà als acziunaris vul l'augment dal chapital d'acziunaris rinforzar la basa da chapital, reducir ils debits nets e servir a la finanziaziun da las mesiras che èn necessarias per realisar la nova direcziun strategica da l'interpresa. Danmai ch'ils dus acziunaris da fin quà – il



**A la radunanza d'acziunaris dad ier a Cuira: da san. il parsura Eduard Rikli, il schef operativ Kurt Bobst ed il schef da finanzas Stefan Kessler.**

FOTO Y. BÜRKL

chantun Grischun e l'Axpo, renunzian ad ina nova participaziun han ils dus novs acziunaris EKZ ed UBS-Cleis gia garantì da sa participar cun totalmain 150 milliuns al nov chapital d'acziunaris.

## Midadas da las statutas

Ils acziunaris han era sancziunà senza opposiziun e cun clera maiortad duas midadas da las statutas. Da nov sto in augment dal chapital d'acziunaris vegnir sancziunà d'in quorum qualifitgà d'almain dus terzi da las vuschs e cuntanscher la maiori-

ritad absoluta da la valita da las acziunaris. Las ulteriuras decisziuns da la radunanza generala sco era las elecziuns vegnan fatgas, sch'ins na pretenda betg auter, cun la maiortad absoluta da las vuschs da las acziunaris represchentadas. Era la proposta dal cussegl d'administracziun da reducir il dumber maximal dals commembers dal cussegl administrativ da 12 sin set è vegnì sancziunà da la gronda maiortad dals preschents. Las votaziuns ed elecziuns vegnan realisadas a moda averta u electronica.

## Pitschna discussiun

A la radunanza d'acziunaris che ha gi lieu ier en la halla d'exposiziun da la citad da Cuira ha sulet in acziunari (Vogelsanger) tschentà ina retscha da dumondas criticas al cussegl d'administracziun. Quellas èn per part vegnidas respundidas dal parsura Eduard Rikli. Sin autras dumondas n'ha il parsura betg vulì u betg pudì dar respostas che avessan pudì satisfar a l'interpellant che ha gia renfatschà pliras giadas a la Repower da perseguitar ina strategia fallada.

## Mutaziuns en il cussegl administrativ

Suenter la demissiu dal parsura Eduard Rikli, Manfred Thumann, Rudolf Huber, Placi Berther e Gerhard Jochum dal cussegl administrativ per ils 21 da zercladur ha la radunanza già da tscherner in nov cussegl administrativ.

Sco nov parsura dal cussegl administrativ è Pierin Vincenz (60) vegnì proponì ed elegì. L'anteriur parsura da la direcziun da la Banca Raiffeisen Svizra ed actual parsura dal cussegl administrativ da la segirada Helvetia, dad Investnet Holding SA, Leonteq Securities SA e Vincenz Management SA e Plozza Vini SA e commember dal cussegl administrativ da las Pendicularas Breil-Vuorz-Andiast è el vegnì proponì da tut ils quatter acziunaris principals sco «commember independent».

Da nov en il cussegl administrativ entran Urs Rengel (54), il schef operativ da las Ovras electricas da Turitg e parsura da Electrosuisse. Medemamain da las Ovras da Turitg vegn proponì ed elegì lur schef da finanzas Peter Eugster (58). El è plinavant parsura dal Centrum Sicherheit SA, EKZ Renevables SA, Enpuls SA e commember d'ulteriurs cussegls d'administracziun. Roland Leuenberger (48) è vegnì proponì dad UBS-Cleis. El è partenari da fundaziun e schef da finanzas da Fontavis SA e dad EVU Partners SA. Actualmain è el commember dal cussegl d'administracziun dad UBS-Cleis, vicepresidente da Fontavis SA, president dal cussegl administrativ dad EVU Partners SA e commember dal cussegl d'administracziun da Hydrolectra SA.

Il chantun Grischun è represchentà vinavant en il cussegl administrativ cun cusseglier dals chantuns Martin Schmid e cun ant. cusseglier guvernantiv Claudio Lardi, l'Axpo cun Rolf W. Mathis.